



Gaza hospital director ka
Israel-i amakdang tepsetogo

Liverpool asayar Diogo Jota
gari lendong nung asü



CM Rio-i New Delhi nung 16th Finance Commission den ajuruteb

Dimapur, Chiteni/July 03 (TYO): Nagaland Chief Minister Dr. Neiphiu Rio aser Deputy Chief Minister TR Zeliang nati Brehostibarnü New Delhi nung Chairman Arvind Panagariya-i anir 16th Finance Commission ajurua liasü.

CM Rio-i pa indang social media X nung, Commission-i Nagaland terenlok asoshi maneni yariba aser inyakba atema pelaba lemsatepa liasü.

Chairman Panagariya-i 2024 küm November ita Nagaland semdangba mapang, January 2024 nungi mapa inyak tenzükba

16th Finance Commission ajanga Government of India nem October 2025 tashinung par report agütsütsü imlar ta shia liasü.

Iba mapang state sorkar parnoki nem sen 20,000 crore capital investments atema proposals agüja liasü. Iba proposal nungya Revenue Generating Projects (sen 4,000 crore), Capacity Building (sen 2,000 crore), Critical Investment and Thrust Areas (sen 10,000 crore), aser Livelihood and Income Generation (sen 4,000 crore) dena liasü.

2025-26 nungi GNM course malitsü: DH&FW

Dimapur, Chiteni/July 03 (TYO): Directorate of Health & Family Welfare, Kohima ajanga nüburtem dang sangdong ka nung Department of Health & Family Welfare ajanga agüja aliba ama academic session 2025-26 nungi tenzükba General Nurse and Midwife (GNM) course magütsütsü ta metetdaksüogo.

Schools of Nursing asem College of Nursing upgrade asüba - College of Nursing, Naga Hospital Authority Kohima; College of Nursing, District Hospital, Dimapur; College of Nursing, Dr. Imkongliba Memorial District Hospital, Mokokchung ajanga item colleges atema B.Sc (Nursing) course tasen ya academic

session 2025-26 nungi tenzüktsü.

Iba atema entrance exam ya Combined University Entrance Test (CUET- UG) ajanga agitsü aser college tem atema menden ya Directorate of Technical Education ajanga angutsü.

Naga Hospital Authority Kohima atema menden 20, District Hospital Dimapur atema menden 40 aser Dr. Imkongliba Memorial District Hospital Mokokchung atema menden 40 alitsü.

Anungji candidates temi item temelenshi meteta mapang shidak nung osang metettsü asoshi nüngdakba websites semdangtsüla, ta sangdong ajanga ashi.

Reservation policy atema July 9 nungi longkak aittsü: CoRRP



Kohima, Chiteni/July 03 (TYO): State nung küm aika memelenshi amshia aruba Job Reservation Policy reprangshitsü akhangba nung longkak aitba shilem tanabuba tenzüktsü, ta Naga nung kin tulu pongu agi tentetba Committee on Review Reservation Policy (CoRRP) ajanga Brehostibarnü sangdongogo.

Nagaland Chief Minister, Dr. Neiphiu Rio-i nüburtem dang iba ken o nung aremzüka atatsü ayongzüker anogo ka lir committee puri kin pongu lenir, lanur aser kaketshirtem den senden amenba sülen iba telemtetba ya agia liasü.

Angami, Ao, Lotha, Rengma aser Sumi kin ajanga tentetba 5-Tribe CoRRP ajanga state sorkar nem joint memorandum

ka agüja Nagaland indang reservation policy reprangshitsü akhangba tali akum.

1977 nungi amshia aruba iba policy ya state nung tang tensa socio-economic aser shisaliok den mapet ta parnoki ashir.

Kohima densema kin pongu aliba district tem nung rally tuluka ayongzükbä sülen Deputy Chief Minister Yanthungo Patton-i June 3, 2025 nü kin pongu sanger den senden ka mena sorkari parnok dang June 17 tashinung Commission ka tentettsü ta ashi.

Ajisüaka CM Rio-i Bodhbarnü nüburtem dang aremzüka atatsü ayongzükdang, Commission indang mapa ya kanga tejangja aser tangsa tangbo results magütsütettsü ta shia liasü.

Paisa administration nunga süang, reservation nunga süang, mesüra delimitations nunga süang, temelenshi kechi südir ajakji national census sülen ang inyaksü, koba 2027 nung tenzüktsü imlar ta pai shia liasü.

State sorkar ola madokba aser terenlok makaba tejashi nung CoRRP ajanga Nagaland Civil Secretariat, Kohima nung July 9, 2025 anepdang 9:00 ako nungi tenzükba 'sit-in protest' alitsü telemtetba agiogo, ta CoRRP member secretary G K Zhimomi-i ashi.

Ibai parnoki longkak aitba phase tanabuba tenzüker alitsü, koba June 3 nungi thinena yua liasü.

"Tang atema ibai anogo ka longkak aitba asütsü. Onoki sorkar telangzüba repranga atatsü aser ano tapet mera agitsü," ta pai ashi aser ano longkak tali aittsü sentong lir ta metetdaksü.

Chief Minister-i ayongzükbä yagi sorkari iba ken o bentettsü

merangba nung yimya meputepba sayur, ta parnoki ashi.

"Küm 48 aremzüka aruba joko maremzükteter," ta Zhimomi-i ashi.

Deputy Chief Minister Yanthungo Patton-i anir June 3 nü senden amendang reservation policy reprangshitsü atema Commission tentettsü sangdongba tang tashi metenteti lir, ta CoRRP ajanga tuteta ashi.

"June 3 seden nung onoki tejangja takangba ana agüja lir... tang amshia aliba policy agentsü mesüra unreserved quota kasa onok nem agütsütsü. Commission tentettsü ya sorkari ratetba lir, onoki masü. Aser it aka sülena iba Commission indang züngsem mesüra 'terms of reference' tejangja maka,' ta pai ashi.

Commission tenteta mapa inyakba nung menuba ya tasa ka asütsü südi, kechiaser sorkar dak temulungtetba dang lira iba ken o tangsa bentettettsü, ta Zhimomi-i ashi.

"Ibai rocket science ka masü. Iba ken o mebenteti küm 48 süyigo - aser ibai ano küm 48 atsülanga modaktsütsüla," ta pai ashi.

Mezüngbo kin tenet atema non-technical aser non-gazetted posts nung küm ter asoshi menden shilem 25 wazüja liasü. Item kin ya shisaliok aser rongsenketzung nung dangar memenep aser state services nung nübu ajema aliba nung ajemdaker 'backward' nüngja agütsü.

Ajisür arudang reservation ya shilem 37 kumogo, kong Eastern Nagaland Backward Tribes tenet asoshi shilem 25 aser state nung danga backward tribes pezü asoshi shilem 12 wazüka yutsür.

Assam: Alinen ajanga Dima Hasao nung train services athi

Guwahati, Chiteni/July 03 (Agencies): Mupa station anasa Lumding-Badarpur hill section nung Bodhbarnü alinen tuluka aluba ajanga Assam indang Dima Hasao district ajunga nung train service anentsüsa akum.

Iba alinen ya nikongdang 2:45 ako meta alua liasü, kong long tulu 30 shi aser ali 100 cubic meters jungnüa alua railway tracks tem nembang.

Railway ketdangsür temi ashiba agi, tenemlen nungi tang tashi long lita maneni longzüka alur, anungji iba tesem ya kumzüka mali aser mürektetba mapakren nunga mapang tali atsülanger.

Silchar-Guwahati Express (Train No. 15616) tera agi iba alinen nungi jenbu, kong on-duty watchman ajanga mapang shidak nung osang agüja liasü. Loco pilot yagi emergency brake amshi aser train ya

nikongdang 3:18 ako tashinung Mupa station-i meyipa anir ao.

Iba alinen aluba sülen jana indoktsü atema machine tulutem yoka lir. Excavators ana tang km 53/2-3 nung mapa teinyakdak lir, aser ani JCB ya Mupa nung BFR ka nung inokba sülen track ajanga iba tesemi bener ao.

Iba alinen mechi Guwahati leni aoba train aika soita ayutsüsa akum.

15616 Silchar-Guwahati Express - iba train ya nikongdang 3:18 ako meta meyipa shilangba sülen Mupa nung soita ayu, 13174 Kanchanjunga Expres iba train ya nikongdang 6:05 ako nung tonga aruba sülem MXR nung anendaktsü, 12520 Agartala-Lokmanya Tilak Terminus Express ya nikongdang 4:00 ako nung New Haflong tonga aruba sülen soita ayu/ 15618

Dharmanagar-Guwahati Express ya Departed Dullabcherra nungi nikongdang 3:47 ako meta ayameso aser NHGJ nung soita ayutsü.

14619 Agartala-Firozpur Express ya nikongdang 3:45 ako nung Jatinga Lampur tonga aruba sülen yangji soita lir.

Railway ketdangsür temi alinen mürektetba sülen ang train operation akhi ama alitsü ta metetdaksüogo aser akok tashi tekeraba nung lendong timtem majurui train akhi ama jajadaktsütsü asoshi meranga inyaktar.

Ibai hopta ishika tsüngta region nung train service nung timtem tulu agütsüba tanabuba alitsü. June 23 nüa New Haflong aser Katinga Lampur tsüngta alinen aluba ajanga kasa Lumding-Badarpur hill section nung train service anenja liasü.

NDPP Mkg nung lenir tasen aniokba sentong agi



NDPP Mokochung Regionpur tanü 2024-2027 kümren asoshi lenir aniokba sentong agi kelen MLA & Advisor Law & Justice and Land Revenue Wb.T.N.Mannen (IAS Retd) aser lenirtem külemi tangokba noksa nung angur.

Mokokchung, Chiteni/July 3(TYO): Nationalist Democratic Progressive Party (NDPP) Mokochung Region pur tanü Sangtemla Community Hall nung 2024-2027 kümren asoshi lenir aniokba sentong agiogo.

Mendenpur tasen shimokba sentong NDPP Nagaland Working President Wb.N.Bendang Jamir ketdangsüba nung agi. NDPP Mokochung Region nung 2024-2027 tashi ketdangsüba anitsüpurtemji NDPP Mokochung Region President Wb.Repameren, Women Organisation President Wt. Margaret, Youth Organisation President Wb.N.Akok Lkr aser Agri.& Allied Organisation nung President Wb.Repamangyang ta shimba aniokba den Organisation balala nungji telen ajak abesa shimtetba tenangzüka agia liasü.

Iba sentong nung MLA & Advisor Law & Justice and Land Revenue Wb.T.N.Mannen (IAS Retd)-i

jembidang Nagaland nung NDPP Party amenoker arudang NDPP Mokochung Region nunga President ana tashi melentepa inyaker anati kanga dang takok tulu nguteta aniogo yamaji tang tasen aitsang lenisüba nunga kasa takok ngua inyaka aotsü tamang akar, anungji par külemi telen balala nung shimoker ajaki aser party züngsem ajaki nentaka inyaktsüla ta ajungshia jembii.

Chingwang Konyak NDPP President aser Chief Minister Dr. Neiphiu Rio tenati aniba NDPP Party ya Nagaland nung tang party tulutiba aser tashi taittiba lir tang NDPP-i aniba sorkar nung tangar party densemba agi Nagaland nung opposition maliba sorkar amenoka lir ta T.N.Mannen-isa ashi.

Nagaland nütsüng yongsük 34 shilemji lanur lir, anungji lanur zünger mapa mongui alirtemi anitetsü asoshi NDPP party-i lanurtem asoshi mera tasen kar agia inyaktsü kanga dang nungtakerta T.N.Mannen-isa party pur den lemsatop.

Sentong nungsa tetoktsür

NDPP Mkg Region President Wb.Mangyangnungba-i salem o jembii, Mokochung Municipal Council Chairperson Wb.Imkongchuba Pongen ajanga tajungshi o jembii aser Working President Women Organisation Wt.Aienla ajanga tepela o jembiba den sentong nung Tsüngrem leniba jazüka Wb.Takonungsang Working President Youth Organisation ajanga sarasadem aser iba den mapa agizükba o NDPP Mokochung Region President Wb.Repameren, Women Organisation President Wt. Margaret, Youth Organisation President Wb.N.Akok Lkr aser Agri.& Allied Organisation nung President Wb.Repamangyang parnoki jembii aser Kr.Imnamen A.Kichu ajanga ken tajung ka tena sentong meraketdaksü aser sentong Students' Committee Organisation Secretary Mapuakum ketdangsüba den telok külemi sarasadem aser iba sentong tembanga liasü.

Lab technician atema training ayongzüka katsü

Dimapur, Chiteni/July 3 (TYO): Free Diagnostic Service dak sendakba nung Lab Technicians tem July 3 nü training agiogo.

Iba training sentong ya Regional Resource Center-North East, Guwahati (RRC-NE) den longiemer Health & Family Welfare, Directorate indang Conference Hall nung agiogo.

Technical session metenzük tsüngda sentong tatsüka agiba mapang Director, RRC-NE, Guwahati Dr. Raj Prabha Moktan-i ashiba agi, health dak sendakba nung Lab Service tem ya kanga tongtibang lir, kechiyong iba ya clinical health service atema dang masü saka preventive public health atema-a kanga tongtibang lir, kechiyong iba ya health service agütsüba ajak den sendaktepa lir. Anungji asenoki tang nungi lab service tem ajungkettsü atema rangloker inyaktsüla aser ibayongji RRC-NE-i capacity building nung teyari agütsütsü telemtetba agia liasü.

Laisa, National Health Mission (2025-2030) taruba phase nungbo health care aser e-Health dak sendakba nung Artificial Intelligence (AI) dak tali rangloker inyaktsü, anungji Lab Service tema tajungba küma yanglushitsü nüngdaker, ta ashi.

Indian Public Health Standard (IPHS) dak ajemdaker

Health structure jenjang balala nung agütsüba lab service taliba kümdaktsütsü Dr. Raj Prabha-i state ajungshia liasü. Laisa, state nung infant mortality rate kanga ajema aliba aser iba den National züngya den medemdangra mashisa aliba tetsürtem yongsü nung anemia ken o kanga ajema aliba atema tenüngsang agütsü.

Maneni lai state nung functional Health & Wellness Center (HWC) shilem 78 lir aser iba nungi shilem 83 nungbo tenüngdakba service tem ajak agütsüdar, ta ashi. Dr. Raj-isa, state nung lenla ajak nung aser talisa Health dak sendakba nung lokti-i shilem tajung agiba atema tenüngsang agütsü, aser Health Units on National Quality Assurance Standard (NQAS) dak sendakba nung Health Units certification tejakdang ser aniba atema tenüngsang agütsü aser ashiba agi, meranga dang inyakra 2025 küm tashi nungbo Health Units shilem 50 certify sütettsü aser 2026 küm December ita tashi nungbo nükjdong yur aliba ama shilem 100 certify sütettsü. Laisa, State indang rational transfer aser posting policy tenüng sanga liasü.

Sentong nung o jembiba mapang Dr. Mereninla Senlem, Principal Director, DoHFW-i Director, RRC-NE, Guwahati dang Nagaland atema teti süoki ia bilemstüba atema pelaba

lemsatopa liasü.

Tashidak balala anepalutsü atema tashidak shidak potettsütsüji kanga tongtibang ta shia lai Lab Technicians tem dang training mapang parnok skill tem arangtetshitsü ajungshia liasü.

Sentong nung ketdangsürtem, training agütsürtem aser shilem agirtem pelashishia agizükba mapang Dr. Avile Zao, Mission, Director, National Health Mission (NHM)-i Lab. Technicians tem dang training mapang yakyaka shilem agütsü aser parnok shisatsü aser tasa arangtetshitsü atema iba ya maangka tajung ka ama agütsü ajungshia liasü.

Maneni sentong nung Dr.Sentimeren Aonok, Director, DoHFW-i tepela o jembiba liasü.

Iba training sentong nung Mon, Noklak, Peren, Phek, Tuensang, Wokha, Zunheboto aser Longleng nungi Lab. Technicians nem tangazükba agütsüogo, aser Kohima, Dimapur, Mokochung aser Kiphire district tem atema July 4 nü training agütsütsü.

Parnok nem Free Diagnostic Service Initiative (FDSI), Internal Quality Control, EQAS aser dak sendakba nung training agütsütsü. Training mapang shisalen sayurtemji Bhaswat Kumar Das, Senior Consultant, RRC-NE aser Pumani Kalita, Consultant, CP-CPHC (RRC-NE) na liasü.

Longleng DC-i African Swine Fever indang metetdaksü

Dimapur, Chiteni/July 3 (TYO): Longleng Deputy Commissioner, W. Manpai Phom-i, Chief Veterinary Officer, Longleng-i district kübok Pongching aser Hamlikhong yimtsüng nung African Swine Fever (ASF) putetba dak sendakba nung osang agütsüba dak ajemdaker, ASF azüoktsü aser prokshia meyoktsü atema item tesemtem ya tashidak agi menar aliba aser Surveillance Zone tem ta sangdongogo.

1. Infected Zone Area: Longleng District kübok Pongching aser Hamlikhong yimtsüng temeket nung km 1 telongtetji infected premises

asütsü

2. Surveillance Zone: Tashidak poteter aliba tesem nungi km 10 telongtetji Surveillance Zone asütsü

Iba dak sendakba nung shisema aliba tesemtem atema osang tejangja magütsü tashi tenokdangba kar agütsüogo:

1. Ak maleptsü
2. Ak aser ak chanu bener marutsü aser maotsü
3. Ak aser akshi belener mesenzütsü

Tashidak prokshia meyoktsü aser nüburttem tekümzüka kübok anema toktsütsü nükjdong nung item tetuyubatem ya agütsüogo.

State level DTES training agiogo



Akunu S Meyase, IAS, Secretary to the Government of Nagaland, Economics and Statistics den ketdangsür tejentem tangokba noksa nung angur.

Dimapur, Chiteni/July 3 (TYO): Department of Economics and Statistics, Nagaland-i, NSS round 80buba indang Domestic Tourism Expenditure Survey (DTES) dak sendakba nung anogo ana atema State Level training sentong ka ayongzüka agiogo.

Iba training sentong ya July 2 aser 3 nü DES Conference Hall, Kohima nung agiogo, kong Districts Economics aser Statistics Office ajaki shilem agia liasü.

NSS round 80buba indang Domestic Tourism Expenditure Survey nükjdongji domestic tourism dak sendakba nung senotsü intokba indang osang tejangja bendentsü, aser iba den Ministry of Tourism (MoT)-i yanglutsü aliba Tourism Satellite Account (TSA) renemtsü atema nüngdakba domestic overnight trip dak sendakba nung household

characteristics, visitor characteristics aser trip characteristics indang osang kar agütsü asoshi lir.

MoT-isa, Travel & Tourism Development Index yanglutsü atema United Nation World Tourism Organisation nem travel & tourism data agütsür.

Survey ajanga ngutetba data tem ya policy bushisüngdang aser sector balala indang policy aser sentotem yanglutsü atema kanga tongtibang lir. TSA dak alaka iba survey ajanga, aine ao tenzüka ita, aine aoba nükjdong, kechi-i aoer aser koma senzür item indang osang balala ayimjemtsü.

Training mapang technical session ya Kiutan Simon, ESO, Mhabemo Ovung, ESO aser Ruokuophrelie, IOS nati agia liasü. Survey ya 2025 küm July ita nungi 2025 küm June ita tashi agütsü.

AR-i tanur ka nem azü tenla agütsü

Dimapur, Chiteni/July 3 (TYO): July 2 aonung District Hospital Phek nung arishi küm 3 tain Shetsito Kezo azü nüngdakba osang angazüka Assam Rifles-i telangzüba agüja liasü. Tanobusang ya Gastro-intestinal bleeding agi timtema liasü.

Phek yimtsüng nung alir Kezo ya jongdak temang anepalutsü atema A Positive azü nüngdaka liasü. Aria bilema Assam Rifles personnel temi tenüngdakba azü ya tenla agütsü

aser iba ajanga tanobusang taküm mesamai sota yuogo.

Iba inyakym ajanga humanitarian aser medical emergency tem nung mezüng telangzüba agütsütsüpur ama lokti ajangzükdaktsütsü aser teyari agütsütsü atema Assam Rifles bendanga agütsür aliba sayur.

Shiranger kinungertem aser mozüki nung staff temi mapang shitak nung teyari agütsüba atema AR sepaitem dang kanga pelaba lemsatopogo.

India aser Ghana nati tezüngzüktep 4 agi



New Delhi, July 03 (Agencies): Brihostibarnü India aser Ghana nati sobaliba, health, standardisation aser institutional dialogue sectors nung tezüngzüktep pezü agiogo. Brihostibarnü Ghana yimtiba, Accra nung India Ato kilonser Narendra Modi aser Ghana Tir, John Mahama na senden amenba sülen tezüngzüktep pezüji agi. Senden tembangba sülen osangbenertem den jembidang Secretary (Economic Relations)

Dammu Ravi-i, "Senden tembangba sülen tezüngzüktep pezü agiogo. Foreign office level nung Joint Commission atema tezüngzüktep ka agi. Tanabubaji sobaliba mozü atema liasü aser iba tezüngzüktep kübok linük anapronglai training agitsü. Tasembubaji cultural exchange programme atema lir aser pezübubaji standard setting atema lir," ta metetdaksü. 1953 küm India-i Ghana yimtiba nung representative

office ka lapokba mapang nungi linük ana tsüngda tesendaktep yanglua liasü aser 1957 küm parnok nüchiso anguba sülen official süa tesendaktep yanglua liasü. Ghana nung mezüngbuba Tir, Kwame Nkrumah aser India nung mezüng Ato kilonser Jawaharlal Nehru nata tesendaktep kanga junga liasü. Onük aika nung tena tangatetba kasa liasü aser linük ana nungi lenirtem senteper Non-Aligned Movement tenteta liasü. Tesüiba mapang Ghana Tirtem- Nkrumah, Hilla Liman, John Rawlings aser John Kufuor nungeria India semdangogo. 1995 küm taoba mapang Ato kilonser P V Narasimha Rao-i Ghana semdangba mapang India-Ghana Joint Commission tenteta liasü. 2002 küm India MEA aser Ghana Foreign Affairs Ministry na tsüngda Protocol on Foreign Office Consultations (FOC) sign süa liasü.

Delhi sorkari ELVs atema totzü nokdangba agientsü mepishir

New Delhi, July 03 (Agencies): Delhi Environment Minister, Manjinder Singh Sirsa-i Commission for Air Quality Management (CAQM) dang Delhi nung end-of-life vehicles (ELVs) garitem dang totzü mayokba tenokdangba benoka aliba ya khenpiga atema agiena lidaktsüner ta mepishiogo, ta Brihostibarnü osang ka ajanga metetdaksü. CAQM-i petrol stations kiburtem dang ELVs garitem nem petrol, diesel mesüra CNG tagütsü, ta tetuyuba agüja liasü. ELVs tetezü, küm 10 dak tali diesel garitem aser küm 15 dak tali petrol garitem lir. July 1 anogo nungi tenzüka item gari tejen nem totzü magütsütsü tetuyuba agütsüogo. Iba tenokdangba ya Delhi nung register asüba garitem atema dang masü saka yimti nung aliba tanga state tem registration

garitem atema-a lir. Sirsa-i shidi ka ajanga CAQM dang, tang-tangbo iba tenokdangba ya mapa küma benoktsü makok, kechiyong National Capital Region (NCR) tesem ajaklen Automatic Number Plate Recognition (ANPR) system junga mali, ta metetdaksü. "Onoki Commission dang NCR tesem ajaklen ANPR system junga merenem tashi Direction No. 89 ji khenpiga atema agiena lidaktsüner ta shiogo," ta Sirsa-i metetdaksü. Delhi sorkari yimti nung mopung quality tajungba akümsü atema inyaktsü, aser tang teinyakdak mapatem ajanga mopung quality tajungba akümsü imlar, ta pai ashi. Osangbenertem den jembidang Sirsa-i, gari tejentem nem totzü magütsüba ajanga nübur aika jashir aser sorkaria sensotem atema bilemstsür, ta metetdaksü. Tang Delhi nung ELVs gari lakh 62 lir (two-wheelers lakh 41 aser four-wheelers lakh 18).

Parliament senden jakdang July 19 nü party ajak senden ayonger

New Delhi, Chiteni/July 03 (Agencies): Taküm tzüngluruwa mongpu Parliament senden jakdang sorkari July 19 nü party ajak senden ka ayongzüktsü, ta Brihostibarnü Union minister Kiren Rijiju-i metetdaksü. Parliament senden July 21 nü tenzüktsü aser tamalen sangdongba ama August 12 nü masü saka August 21 nü ang tembangtsü, ta Union Minister-isa metetdaksü. Independence Day anogomong sentong dak sendakba nung August 13-14 anogotem nung senden mamentsü, ta paisa metetdaksü. Taruba Parliament nung sorkari kanga tongtibang bill aika benoktsü tebilemba lir, ibayongji mezüng sangdongba ama August 12 tashi masü saka anogo tali atsülanger August 21 nü ang senden tembangtsü.



Kanga tongtibang bill tem rongnung kaji atomic energy sector nung private companies züngoktsü atema lir, iba atemaji sorkari Civil Liability for Nuclear Damage Act & Atomic Energy Act yanglushitsü tebilemba lir. Iba dak alia Indian army temi Operation Sindoor agiba sülenbo tang mezüng Parliament senden amentsü, anungji taruba senden nung iba onük nung o enteptsüa akok. April 22 nü kiralongrartemi Pahalgam amakba sülen May 7

nü Indian army temi Pakistan aser Pakistan-occupied Kashmir nung kiralongrartem camp aika amak. Iba sülen nungi Opposition party temi Operation Sindoor dak sendakba nung o lemteptsü atema sorkar nem takhangba agüja arur. Pakistan-i India nung raraba tayimtsü aika khazükogo ta jembiba dak sendakba nung opposition-i sorkar dang telangzüba meshir. Ano külen US Tir Donald Trump-i, India o Pakistan na tsüngda nuclear rara anentsüsa pai tiyongtsüi aita jembi, ta sangdongbajia opposition lenirtemi jangjaner. India sorkaribo Trump-i jembibaji tai ta shiogo. Taoba ita phone ajanga jembidang Narendra Modi-i Trump dang, tiyongtsüi aita jembitsü atema India-i kodanga magizük, aser tarutsü nunga magizüktsü, ta shiogo.

AAP-i tangar den meloktepi tokteptsü: Kejriwal

New Delhi, Chiteni/July 03 (Agencies): Brihostibarnü Aam Aadmi Party (AAP) tongti lenir, Arvind Kejriwal-i, taruba Bihar assembly election nung AAP-i tangar den meloktepi tokteptsü; AAP-i opposition INDIA den loktepbaji 2024 küm Lok Sabha elections atema dang liasü, ta metetdaksü. Osangbenertem senden ka nung jembidang Kejriwal-i, "INDIA telokteppi Lok Sabha election atema dang liasü. Tangbo Congress den teloktep mali. Teloktep ali asübo kechiba Congress-i Visavadar by election nung toktep. Onok tamakok ngudaktsütsü atema parnok aru. Onok tamakok ngudaktsütsü aser votes ajema kümdaktsütsü atema BJP-i Congress yok," ta ashi. Tawa by election nung Visavadar menden nung AAP-i Gopal Italia toktepdakja liasü aser pai vote tali 17,581 agi BJP lenir Kirit Patel madak takok angu. Congress Nitin Ranpariya-i vote ishiba ngua liasü. Taoba mapang Delhi aser Haryana Assembly elections nunga Congress aser AAP nati peipei sasep nung toktepbaji liasü. Ano külen BJP national otongdar, Ajay Alok-i, "Bihar nung aser Purvanchalis nungeri Delhi nung Arvind Kejriwal kou ongdokja liasü aser Delhi nungi meindok, ajisüaka pa atema iba jagi meperi. Nai ano mapang kobika Punjab nung ATM amshitsü? Punjab ya sentsüh agi tsübangdar," ta ashi. "Kejriwal-i Bihar-i arura pai yimtenren nung pa jenjang angatettsü. Bihar-i arung," ta paisa ashi.



July 03, 2025 nü Bengaluru nung Devanahalli nung aluyimertem pusema longkak aitba sentong nung Samyukta Kisan Morcha (SKM) lenir Rakesh Tikait-i osangbenertem den jembidang tangokba noksa nung angur.

Form No. 3

[See Regulation-13 (1)(a)]

DEBTS RECOVERY TRIBUNAL GUWAHATI

Suwarna Bhawan, House No. 12, New Town Path, Near Haniman Mandir, G.S. Road, Ulubari, Guwahati -781007 (Assam)

Case No.: OA/459/2024

Iba Act nung section 19 aser sub-section (4), iba denji külemi Debt Recovery Tribunal (Procedure) Rules, 1993 nung rule 5 kübok sub-section (2A) nung ajemdaker jaoker

Exh. No. 5237

AXIS BANK Ltd

VS

MR IMSU YADEN & Anr

To,

(1) MR IMSU YADEN, SON OF CHUNGMALEPA YADEN DIMAPUR SADAR NEAR INDISEN BAPTIST CHURCH INDUSTRIAL ESTATE DIMAPUR NAGALAND-797112

(2) MRS IMSU JUNGLA WIFE OF IMSU YADEN DIMAPUR SADAR NEAR INDISEN BAPTIST CHURCH INDUSTRIAL ESTATE DIMAPUR NAGALAND -797112

JAOKER

09/06/2025 anogo nung Hon'ble Presiding Officer/Registrar matsüngdang OA/459/2024 benoka liasü.

Rs. 4839339/- sentsüh atema iba Act kübok section 19(4) kübok application nung ajemdaker sentsüh alangzüktsü atema na anema (OA) benoka Hon'ble Tribunal-i jaoker/notice agütsür (application den documents copies densenma lir). Iba Act nung section 19 kübok sub-section (4) nung ajemdaker defendants dang teküboklen aliba tetuyuba agütsür:-

(i) tajaba agütsüba sülen anogo semer nü tsüngda relief asoshi mepishibaji kechiba magütsütsüla, iba kuliji sayutsü metetdaksü;

(ii) Original application nung serial number 3A kübok applicant-i shia aliba kiojen aser assets dak alia tanga kiojen aser assets sangdongtsüla;

(iii) Original application nung serial number 3A kübok shia aliba kiojen aser assets ayoktsü mesüra item kiojen atema inyaksangshitsü memelar;

(iv) Security interest atema inyaksangshiba dak alaka Tribunal dang nungi jelia temelaba magii original application nung serial number 3A nung shia aliba kiojen mesüra tanga assets ayoktsü, lease asütsü mesüra tanga kecha inyaksangshi masütsüla;

(v) Ordinary business ajanga secured assets mesüra tanga assets aser kiojen nungi yokzüba senji security interest soita aliba bank mesüra financial institutions indang account nung deposit asütsüla.

Nü dang tezüluba nung sangdong applicant nem agütsütsü tuyur aser 17/07/2025 anogo nung anepdang 10:30 ako nung Registrar matsüngdangi arutsü tuyur, yamaji meinyakra application ji angadangtsü aser na meliaka telemetba agütsü.

For Paper Book follow the following Uri: <https://cls.drt.gov.in/drtlive/paperbook.php?2n=202532040610>

10/06/2025 anogo nung tsünglanglen kü meyongnem den iba Tribunal indang seal agütsür: Sd/-

Registrar

Debts Recovery Tribunal

GUWAHATI



TIR YIMYIM YIMOBILEM (EDITORIAL)

DIMAPUR

ROGONÜ

CHITENI 04, 2025

Shibai sen amtsü ?

Tanü putu nung asenok asoshi tebilemtsü tulu kaji sen makaba aser sen bushitsüba tebilemtsü masü saka sen amshiba nung ochishia inyaker nisung tajung angutsüba tebilemtsü ya asütsü. Aji oda, government nung dang masü saka asenok lokti aser arogo nunga senotsü shitak ochishia mamshitetba ajanga yimdong agi ayong kümer senzür, lokti nung meputep adoker aser arogo tenüng menüksür. Aji oda, government mapa nung sen crore ana agi atemtsüba mapa ka crore ter agi mashimashi inyaka toktsür aser sen amsangi kecha mekorui odang agütsür. Kasaji, nübortemia mapa meinyak ser anogo noklang ka sen agizüka aginer aser ano kasajisa mapa meinyak ser agizükba senji ketdangsertemia aginüa meshir, anungji ochimashiba senji bushia apurbo mali saka ajaki aginüa arishiba putu ka nung asenok alir. Iba denji kecha tetsüngda mali, arogo nunga sen mapangser shimtsüsa temulung lemtet nisung mali shisabolur. Aji oda, arogo nung tenzükertem dakang temulung melemtetba aser mapangsertem dakang temulung melemtetba ta asütsüsa aküm nungji, tanü asenok arogo dak yimten aser lokti nung ochimashi mapatem anema ola adoktsü tashi, moral authority, mali kümogo. Tanü asen nübortem asoshi tia tamajungtibaji yimten nung ochimashi mapatem jakdaka inyakba ya masü saka item ochimashi mapatem anema arogoia ola madoktetsüsa, arogo nung ketdangsertemang tamajungba aser ochimashiba akümba ya asütsü. Aji oda, tesüngmangtsüka aser tetsübuttsükaji, tanübo yimten aser lokti senpong nung dang masü saka arogo senpong nung dena teka amuoktsüa marendaki akümba ya lir. Tamangertemi tenla kidangi tenla bener aruba ya, kar dak alaka, mapa meinyak aser angati anguba sen nungi ter shilem, tepela aser temoatsü tenla bener arur masü saka kar ita piyong teberem ajak kusüka, techimi agi komo küma office nung amenba sen, kar anogo shia anü aser tzünglu manung ayangba sen, karbo an ka metsüteta ayokba sen, karbo ak ka yoker pei nüngdaka meperi saka Tsüngrem shilembosa agütsütsü ta ser bener arua tenlaba sen, ano karbo bazaar nung anogo piyong aonsutsü yoka amenba nungi aaba sen aser ano kaketshir karbo scholarship anguba nungi ter shilem agütsüba sen ta amangba purtemi tenla kidangi tenla bener aruba ya angati sen a masü aser pei nüngdak perir anüngba sen a masü saka peii ajangzüktetba nungi tepela nung Tsüngrem shilem bener arua Tsüngrem yimli asoshi amshitsü tenlaba sen lir. Ajisüaka, iba senji kari tesarudak nung auyar, kari sarur sen azüngba mapang auyar, ano karibo sen senpong nungi pei agitetnüsü agiteta agir aser karibo mapa inyakba sen nungi alepzüker ta government nung tuluba nungi tilaba tashi pei pei tsüda commission agitetyonga aodangbo nübortem asoshi nüngdak inyaktsübo manüng amai, arogo nunga teka talang aika aliba agi Tsüngrem mapa inyaktsü asoshibo sen manünger. Iba tensa tia ya linük nung tongpangbo ayongzüka ayu saka sepai asütsü nübo mali amai kanga shisabolutsüba mapang lir. Aji oda, tanü lokti nunga temulung lemtettsüsa nisung malinungji züngsem saru sarutsü asoshia nübo manguba mapang ka nung asenok sen agi masü aser chiyongtsü agia masü saka ochi agi anünger. Kasaji, tanü asenok sen bushitsüba tebilemtsü masü saka shiba nem sen juli amdaktsütsü ? Shiba nem lokti aser arogo sen amshidaktsütsü aser shirnok nem audit agidaktsütsü (?) ta asüba tebilemtsü agi timatemer. Aji oda, asenok yim ya auer yim aser asenok arogo ya auer arogo, ajak auer aser ajak ochimashir, anungji aueri auer dak temulung melemtetba amai asenok o asenok na temulung melemteper. Ibaji temulung malemla malemer, kechiyong arogo sen meshiteta sarasademer ayuba sen kenyongi marendaki ochimashi amshiba lima aser arogo nung shibaibo shiba dak temulung lemtettsü ? Aji oda, tenla agütsünertema tenüng zülur abena majung aser mezülü abena majung ta tom nung temulung menendaktsür. Iba ama Tsüngrema metsübui ochimashi mapa inyakba nungi asenok temulung meyipa maru tashi asenok alima tsüngdang maksü ajurupet ajurutsü aser Tsüngremi azüktsü.

OLEMSABANG

Alu aser shishidak revival ajanga temelenshi

Wati Longchar (Ehkranipathar)

Lanur Mapa Makaba Tashitak

Tanü Naga nunger tebilemtsü tulutibaji lanur ka zünger tapet mapa mali kazüa aliba ya lir. Degree tajung ngur mapa mali tsürabur dak metaloker alitsübaji maksü tulutiba lir. Iba den medemer karbo mapa ngur (kar backdoor ajanga aser kar competitive exam ajanga) pelatep dang, aser ano küma tain akümer ta ajurudang, shisabulu aika ajurur. Iba timtem tsüraburia, arogoia mangatet senzüka yutsür. Iba jagi pei tepok asoshi parnok mapa kabosa inyaktsüsa akümer. Tanga lima nung industry balala renloka aoba amai, Nagaland nung nüchiso bushir telok renloker, tang telok 28 tashi küma aoba angashir, ano prayer centres anogo shia lapoka aor, theological college/training centres, scam balala, shi-jabujari, sen-saiba, sen tetemlok atuba, temesepba mozü ayokba item ajak ya asen lima lanur mapa makaba, sensak tia, aser nükla samaba tashitak ta metetdi.

Tanü asenok consumeristic society ka nung alir. Senbo mali saka restaurant tajung nung dang chiyungnür, mobile bo meyangluteter aser sen mali, saka jenjang tajung dang aginür, gari meyangluteter aser sen mali, saka gari tajung dang amshinür, sen mali, saka ki tulu aser tajung dang sünür, sen mali saka süoshi latest fashion jenjang tasak dang aginür. Shirnoki itemji maliteter parnoki look down asür. Yamaji Naga nunger aika consumeristic ideology-i moyokatoker sen dak alaka tenüki kecha mangur. Ibai ajanga lokti ajak nung, arogo nunga corruption adokba jembir. Naga nungeri arrtsü atena oa mission inyaktsü dang jangrarashi, pei atepzüng nung mission mapa inyaktsü mejangrar. Iba tangatetba melenshitsüla.

Alu aser Shishidak Revival Adokdakjang

Lokti teraksa tensa ka nung arogo dak alimai tamang makateti kümdaki. Amangbapur tanela nung azüla-a aoba, aser para-church aika tenteta aoba tebilemtsü den, arogo nung ochi meshi-i rongsen amshiba ajanga Khristan tamang kuli maka akümer. Emotional süa revival agiba kisüng agi asen lokti meyanglushitettsü. Revival akadak jaka aser inyakyim melenshitsüla. Yimdong, shishidak, alu nung revival adokdaktsütsü Tsungremi o aser taküm libalirui sayutsüla. Laishiba nung tanela lima ka nung revival agitsüba indang shia mali, iba lima nung taküm yanglushitsüba indang dang shia lir. Tanela aser shi taküm tekümtet asoshi dang sayur. Mathi kaket 13:44-46 Yisu-i o intepba ana shia angur. "Kotak Yimli alu nung senti rongsen miimba mesüker, koba nisung kadi angü; aser pai tepela nung pa akaba ajak ayoker aser iba aluji alir." "Ano, Kotak Yimli berem tajung bushir shidi-bener ka mesüker. Pai sen jenjang aika alangba senti berem ka angü nungji, pai oa pa akaba ajak ayoker aser ibaji ali." Iba o intepba nungji alu (field) aser shishidak (market) indang shia angur. Yangi alima balaka indang ashir masü iba lima indang ashirba. Tetezü kotak yimlijji iba lima nung ajangzüksüla ta ashirba lir.

Kechiba Yisui `kotak' masü, `alu' indangang o intepba jembir? Yisu mapang aluyimba mapa ya tongtibatiba mapa ka liasü. Nübur aika aluyimba mapa inyak, arogo piyong, küm piyong yangji mapang intok aser alu ayimba ajanga nübur taküm ali. Ali aser aluyimba nung taküm ajunga soita ali nung, takari ali temo akadak aser aluyimtsü jaka tajung ajak aliatok. Sensakertem sentsüh tetemlok makok pei li agütsü, aser yangji alar süa par luji inyakdaktsü aser süngjangji kibur den lemdanga achi. Iba jagi aluyimer/sensaker taliba jenjanga kanga mejungi aküm aser takartem kanga talubo nung liasü. Anungji aluyimba aser ali rongsen ochi meshi-i agiatokra, aser sensaker dang temeim mesayura, kotak yimli majangzüktet ta sayur. Ya lokti taküm yanglushitsüba indang ashir.

(Maneni asüng adok nung angutsü...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Sayutsüngir, Jimmy Swaggart alima nungi pilaogo



July 03, 2025: Nüngtugu sayutsüngir, Jimmy Swaggart Mongolbarnü (July 2) alima nungi pilaogo; pa arrshi küm 90 liasü.

Pa indang ministry-i sangdong ka ajanga, "Adianu Swaggart ali wadang tembangogo aser pa Kümzüksang, Yisu Khrista dangi ogo. Pai küm aika ken tena arubaji tanü anogo atema liasü, kechiyong pai pa Kümzüksang ajuruogo aser sentsüwangshii ayaokogo. Ajisüaka kenü anogo asenoki pa sentsüwangshi nung tanaben ajurutsü ta meteta onok mulung süngzüker," ta metetdaksü.

June 15 nü Swaggart temelungjang tashidak adoka liasü saka medical nisungtemi pa kümzüka hospital-i anir oa liasü.

Ministry-isa, "Küm 70 dak tali adianu Swaggart-i sayutsüngi, osangtajung ken aten aser Yisu Khrista tashi aser Tanela Temeshi nung baptitsü atema nisung million aika ajungshia liasü. Pa olaji linüktem aika nung metanga ao aser pai atenba kentem ajanga nisung aika melung süneptsüogo. Yisu Khrista Kangki nung asüba osang pai proka liasü," ta metetdaksü.

"Pa ya sayutsüngir ka dang masü saka Tsüngrem külemer ka, tongbang rarar ka aser Tsüngrem taochi indang kulisür ka liasü," ta ministry-isa metetdaksü.

Assemblies of God General

Superintendent Doug Clay-ia sangdong ka ajanga, "Sayutsüngir Jimmy Swaggart alima nungi pilaba osang angashia ni jashir. Pa taküm aser ministry ajanga mezüngdangtetba taküm aika kongshiogo aser Assemblies of God kibong-a kongshiogo. Ni Swaggart kibong aser Jimmy Swaggart Ministries atema sarasademtsür. World AG kibong tenüng nung ajak nem tesünep agüjang ta ni sarasademtsür," ta metetdaksü.

Gainesville, Georgia nung aliba Free Chapel nung Pastor Jentezen Franklin-i, Louisiana nung amenoka aliba pastor-i alizüng tonga asemogo, ta metetdaksü.

Franklin-isa, "Tanü pa nem akhüm agütsür. Pai asem tenzüka mapang dang nungibo alizüng atongba mapang tashitaitba asemogo aser tanela million aika kokogo. Pa kinüngtsü aser par kibong züngsemtemi maneni pa tsüngsü nung jaja alima den Khrista indang lemsateptsü. Iba dang nungi tali kechi meshitsü? Tatemsa pa ki tongogo," ta metetdaksü.

Hopta ana tejaklen Swaggart'er jabaso, Rev. Donnie Swaggart-i Family Worship Center nung tekülem sentong agidang tebu temelungjang tashidak adoka hospital-i anir aoba osangji metetdakja liasü.

Donnie Swaggart-i, "Pa süchia aoba sülen shia maru.

EMT maru tashi onoki melentepa pa teku nung nemshia liasü. Khenyongi nisung aika arua yaritep, anungji ajak dang pelar. Tesülen pa temelungjang tanaben arakzü liasü. Tang pa ICU nung lir, aser Tsüngremer sayatenya ka medenibo pa mekümzüksü. Ajisüaka onoki Tsüngrem dak dang imlar aser maneni sarasademer," ta metetdakja liasü.

Jimmy Swaggart ya 1935 küm March 15 nü Ferriday, Louisiana nung aso. Pa arrshi küm 8 asüdangyongi pa tekümtet angu aser Tsüngrem tenzüksü melungteta liasü.

1955 küm pai full-time ministry tenzüker aser Baton Rouge, Louisiana nung aliba Family Worship Center nung pastor inyakba den külemi SonLife Broadcasting Network tenzüka liasü.

Mapang ka nungbo America nung sayutsüngir tajungtübaji pa liasü aser pa indang broadcasting ministry program ji kibong million 2 dak temai repranga liasü.

Pa ya kenteter tajung ka liasü aser pai adokba kensep million 15 ayok. Pai kaket-a 50 jungnüa züluogo.

Ministry-isa, "Yimlibilema Sister Frances, Donnie, Debbie, Gabriel, Jill, Jennifer, Clif, Matt, Joanna, Sam, Ryder, Abby, Lola, Harper, Navy, Harrison, Caroline aser Mackenzie nung atema maneni sarasademjang," ta mepishia metetdaksü.

China nung Khristan asem anema ken o angadang tenzükogo

July 03, 2025: China nung register süa maliba house church nung züngsem asem anema Baqiao District Court nung ken o angadang tenzükogo, ta International Christian Concern (ICC)-i metetdaksü.

Xi'an, Shaanxi nung aliba Church of the Abundance (Fengsheng) nung Pastor Lian Changnian, par jabaso Pastor Lian Xulian aser Sister Fu Juan nung 2022 küm pua liasü, ajisüaka tang ang parnok anema

ken o angadang tenzüker.

Khristan lenirtem jagi senotsü tsütsü aibelenogo, ta Communist ketdangsertemi parnok nem tai tonglokja lir. Iba Arogo ya tesüiba küm 30 tejaklen lapoka liasü ajisüaka sorkar ketdangsertemi iba Arogo shibangtsüogo.

Communist ketdangsertemi register süa maliba house churches nung ter shilem tenla aser tenla balala bendenbaji senotsü tsütsü aibelen lir, ta züngshir.

Ketdangsertem ket nung aliba mapang nung Pastor Changnian temang kanga tamajungba kümogo. Khristan lenir asemji taküm April 12 nü bail nung chioka liasü aser June 24 nungi court nung parnok anema ken o angadang tenzükogo.

Ken o angadangba mapang nung Arogo nung züngsemtemi Arogo nung ozüng alema tenla mesaru ta kuli ashitsü atema temelaba meshi saka court-i temelaba magütsü.

ANOGO ABEN TSÜNGREM DEN

Ne Mulungtet Takang

Aser kodang pa temai adoka agizüktsü anogo abensa ya adok, pai Yirusalemi aotsü mulung mulunga pa tejak ilenji meyip. Luke 9:51.

Khristan taküm nungi atsüngzüka aotsü temela! Kodang Tsüngremi ne nem kechi inyakdaksüner aji nai angatetta arur na meketa alir ajaki ne mapang aser teyari ajaki ama asütsü! Kodang Yisu asoshi kangki-i atutsü mapang tonga aru, pai pa tejak Yirusalem leni meyip, aji asü nungdang shingai Tebui mulungba menokdangtettsü. Pa temulungtet tejanga ngur Samaria nungeri Yihuda nunger ka parnok yim ajanga Yirusalemi aor bilema parnoki pa magizük.

Yisui pa tenyaba nungi matsüngzüksü mulungtet saka pai leman nung aika tenzüksü mapang agi pai nütsüng neter temeket townsi yok (Luke 10:1). Pai chitemra akettertem anebtsü (Luke 17:11-19). Temang waka shirangertem anebtsü (Luke 14:1-4). Pai Zachariah kidangi tekümtet bener aru (Luke 19:1-10). Pai maneni nütsüngtem dang sayu (Luke 15:1-32). Yisu Kalvaryi atudang Pai tangar tenzüksü mesongtem saka Tebui mulungba nungi atsüngzüksü pai memelung.

Tsüngremi ne nem kechi inyakdaksüner nai metetta lira, ibaji atalokdaksütsü bendanga mulungtetter, ne tejak mulung mulunga iba tsütsü meyipang (A.Shin 4:25). Tangar matsüngdang na Tsüngremi aniba kuliji ne temulungtetbaji asütsü. Na meketa mapang tajungi (opportunity) Tsüngremi na ajaba alizüng nungi matsüngzükdaksütsü kümdangang. Tatitangbai tashi angatsü menua tekümdaksü mesüra tesentokdaksü. Nai Tsüngrem nungi tejangja mapa agizük, ne tashi angaba nung mainshi inyaksüla.

Colombia nung Khristan lenir 8 tasü mang tesem ka nung remer angu

July 03, 2025: July 02, 2025 nü Colombia nung ketdangsertemi Evangelical remer angu, ta ketdangsertemi metetdaksü.

Tasü mangtemji Calamar municipality kübok angu. Khristan lenirtemji Arauca nungi lir. Iba region nungji mission mapa inyakba mapang nung parnok sama.

FARC anemertemi April ita nung Khristan lenirtemji jaoka liasü, talisa Iván Mordisco-i aniba Armando Rños Front-i Khristan lenirtemji jaoka liasü.

ELN cell tasen ka nokdangtsü tebilemba nung Khristan lenirtemji tepset asütsüa akok, ta bilemer, ajisüaka Khristan lenirtem aser Armando Rños Front na tsüngda tesendaktep aliba kuli kecha mali.

Taküm May ita nung ARF züngsem ka apuba sülen pa dang asüngdangyaba mapang nung pa meyong mobile phone nung Khristan lenirtem noksaji liasü, aser ibaji ajanga Khristantem aremba tesemji ngutet.

Khristan lenirtemjj James Caicedo, Óscar Garcka, Mjryuri Hernández, Maribel Silva, Isaid

Gómez, Carlos Valero, Nixon Peñaloza aser Jesss Valero nunger lir aser parnok ya Evangelical councils Alianza de Colombia & Cuadrangular nungi lir.

Iba dak sendakba nung Evangelical Confederation of Colombia (CEDECOL)-i sangdong ka ajanga iba tatalokba sashia aitsüba den külemi takoksa angur kibongtem aser Khristantem den mangyim jashi lemsatep.

CEDECOL-i sangdong ka ajanga, "Onoki takoksa angur kibongtem nem tesünep agüjang ta sarasademtsür. Onoki iba tatalokba sashia aitsür aser ketdangsertem dang tekeraba nung bushisüngdanga aibelenertem nem temerenshi agüjang aser region balala nung mission mapa inyakertem kümzüksüsa inyakang ta akhanger," ta metetdaksü.

Colombia Tir, Gustavo Petro-ia iba tatalokba sashia aitsü aser iba ya meimchir temeden anema inyakba lir, ta metetdaksü.

Calamar nung Mayor-ia sorkar dang benjunbentsü nung temelung magütsüi nüburtem kümzüksü atema inyaksüla, ta metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Teprang

(adj) sentsü tejakja aser kanga tesangwa (bright, shining)
* Tsümartemi sentsü teprang süoshi meimer.

Tepru

(n) süng agi yangluba tateptsü (wooden shovel)
* Asenoki tepru amshia lishi tepdoker.

OLONG PAITEP # 7199

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPIEN

1. Yakob tetsü - (6)
4. Mezüing nisung - (4)
6. Tasen lai kakat ka - (5)
9. Aou lanu - (2)
12. Tejen lai 21 buba (11) -
15. Tekolak tembar - (2)
16. Zütsüra anepsang - (5)
17. Kain tenu - (4)
18. Hana-er jabaso - (6)

LANGTSÜNGLEN

2. _ _ _ gki - (3)
3. Telungpur telok ka - (2)
5. Tsüngremi mezüing poktetdaksüba - (5)
7. Tia - (4)
8. Yakob-er jabaso ka - (5)
10. Abraham tebutzü - (4)
11. Rebeka tebuba - (4)
13. Esau tenu - (5)
14. Tzünglu tilala aru - (4)
16. Jafet tebu - (3)
17. Teka agi kongshi - (2)

OLONG PAITEP # 7198 TELANGZÜBA

TIPIEN :

1. Meyi, 6. Shin, 7. Yimkong,
9. Tera, 11. Teberem, 12. Anem,
15. Senmang, 17. Tenü, 18. Anep.

LANGTSÜNGLEN :

2. Yim, 3. Tanü, 4. Shilem, 5. Ano,
7. Yakta, 8. Kilem, 9. Tenem,
10. Amang, 11. Tenüing, 13. Mela,
14. Ita, 16. Ain.

NAI-A YA METETTER MA



Edgbaston Cricket Ground, Birmingham nung England den tanbuba Test asaya tananübuba Shubman Gill-i double century ka yanglua pa indang career nung tang mezüingbuba double century yangluogo. Iba alizüing tongtetba sülen Gill ya England nung double hundred yangluba India nung asayar tasembuba kümogo, aser India nung captain tem rongnung mezüingbuba kümogo. Pairun 200 ya ball 311 nung yanglua liasü.

Assam: CPI(M)-i July 4 nü longkak aitba sentong ayongzük

Guwahati, Chiteni/July 3 (Agencies): Communist Party of India (Marxist)-i July 4 nü state ajunga nung longkak aiba sentong ka ayongzükba sangdongogo. Assam nung Garukhuti Multipurpose Agricultural Project kübok Gir nashi alizükba aser lemtsüba dak sendakba nung ochi mashi inyakyim sendaka lir ta shia parnoki iba longkak aitba sentong ya ayongzükogo.

CPI(M) state secretary Suprakash Talukdar-i Bodhbarnü party indang state office nung osangbenertem den sensaksemba mapang senotsü mashiyimi amshiba atema Assam sorakar aitsüogo.

Paisa, iba ochi mashi inyakyim ya sitting mesüra retired obendanger ka nem mapang atakzüka yur bushisüingdangdaksütsü takhangba agütsüogo.

Osangbenertem den sensaksemba mapang CPI(M) central committee züngsem Isfaqr Rahman aser state secretariat züngsem Nayan Bhuyan aser Nirangkush Nath nungera Talukdar den densema liasü.

Lenirtem yagi RTI, official record, Assembly proceeding aser media osang balala

asadangba sülen figures aser data meputepba lemsatepa liasü.

Parnoki ashiba agi, Gir nashi bener aruba, lemtsüba aser asüba indang osang agütsüba dak sendakba nung osang ya meputep.

Party-i ashiba agi, Assam sorkari 2022 küm January 7 nü state-i Gir nashi bener arutsü atema Chief Minister Himanta Biswa Sarma aser Union Minister Parshottam Rupala na matsüingdang tenangzüktepba nung sign süa liasü.

Iba sentong kübok Garukhuti project atema nashi 5,000 densema Gir nashi 15,000 bener arutsü nükjidong liasü.

Ajisüaka RTI ajanga kuli meputepba sayuogo. RTI telangzüba ka nung 2021 küm November ita nashi 98 bener aruba indang shia lir, aser tanga ka nung 2022 küm January ita nashi 24 aser nashipongchi ka bener aruba shia lir.

Agriculture Minister Atul Bora-i 2023 küm March ita Assembly dang sorkari 2021 küm November-December ita Gir nashi 122 aliogo aser nashi techanu mepuba sülen ajak senteper nashi 176 kümogo ta ashi.

2024 küm February ita

record ajanga National Dairy Development Board (NDDB)-i nashi 300 agütsüogo aser 2023 küm April ita nashi 210 officially bener aruba sayuogo.

CPI(M)-isa, nüburtemi shimba lenirtemi aluyimertem nem nashi 90 lemtsü aser item nashitem nungi 56 mapang tatsüka lir süatok, ta ashi.

Party-isa, 2022 küm Angh indang budget speech aser media osang na meputepba tuteta sayuogo, kong 2021 küm November ita tashi nung nashi 108 bener aruba dang shia lir.

Tawa project officer Yugabrata Nath-i ashiba agi, iba project benoka inyakba tesem nung nashi chanu 130 densema Gir nashi 210 lir ta ashi.

Gir nashi ochi mashi ken o bushisüingdangtsü akhangba den CPI(M)-i Cabinet Minister Jayanta Malla Baruah mapa nungi agintsü takhangba ka agütsüogo.

Party-isa, minister indang kinungtsü meyong farm ka indang income 2020 küm lakh 1.19 aliba nungi lakh 77 ajungba ajanga iba farm ya black money tsütateptsü atema amshir asütsü ta sayuogo, koba Jal Jeevan Mission fund dak sendaka alitsü akok, ta ashi.

Mizoram nung Myanmar nunger refugee tem biometric data bendentsü

Aizawl, Chiteni/July 3 (Agencies): Mizoram nung jenoka aliba Myanmar nunger refugee 32,000 dak tema indang biometric data bendentsü atema renemdar, ta ketdangsür tejen kati metetdaksü.

State Additional Home Secretary Andrew H. Vanlaldika-i ashiba agi, biometric aser demographic data ya iba ita state kübok district 11 prongla nung aliba refugee tem nungi bendentsü.

Pai ashiba agi, district administration temi ketdangsürtem nem training agüjatokogo aser parnok nem computer, webcam aser enrollment inyakyim atema tanga hdirtem densema tenüingdakba hadirtem yakta agütsütsü.

Vanlaldika-isa, biometric enrollment ya district administration tem terenemba aser parnok mapang apir iba ita tenzüksü, ta metetdaksü.

Pai, enrollment inyakyim ya Myanmar nunger refugee tem jangjatsü atema dang ashi parnok meyipa yoktsü atema agir masü, ta jangjashitsüogo.

Maneni pai ashiba agi, ketdangsürtemi southern Mizoram kübok Lawngtlai district nung jenoka aliba Bangladeshi nungertem indang biometric enrollment-a agitsü akok, koba centre tetuyuba dak ajemdaker inyaksü.



Kasa mapang nung Aizawl Deputy Commissioner Lalhriatpuia-i, Aizawl district nung iba enrollment inyakyim ya yakta tenzüksü ta shiogo.

Ajisüaka pai ashiba agi, iba inyakyim benoka inyakba mapang ketdangsürtemi tetsükdaksü ajangshitsü akok, kechiyong Myanmar nunger refugee tem ya arrtsü adena aiben senzisenponger aser iba ajanga parnok kwi aru aser ao tejangja memeteter.

Pai ashiba agi, Aizawl district nung tang Myanmar nunger refugee 3000 shi jenoka lir.

State Home Department indang data ajanga, state kübok district 11 nung Myanmar nunger refugee 32,419 jenoka aliba sayuogo.

Ajisüaka regugee tem züngya ya anogoshia melenshia dang alir, kechiyong refugee tem kar mapangshia Myanmar nung pei yimtsüingi oli aser tatsüka lir

Mizoram-i meyipa aruli asür, ta tang home department ketdangsür kati ashi.

Kasa data ajanga Chittagong Hill Tracts (CHT) nungi Bangladesh nunger 2,371 state nung jenoka aliba sayuogo.

Iba den bendenloksema Manipur nungi Zo nunger 7,354 jenoka lir, shirnok state nung azütokshi lendong atokba ajanga 2023 küm May ita nungi Mizoram nung jenoka lir.

Myanmar nungertem ya timba Chin state nungi lir aser parnok ya 2021 küm military-i sorkar atsüingba sülen Mizoram-i jena aruba lir. Kasa mapang nung Bangladesh nungi arurtem ya military-i telungpur telok ka anema jenjang agiba sülen ajenba lir.

Myanmar nungi Chin nunger, Bangladesh nungi Bawm kin aser Manipur nungi Kuki-Zo nunger ya Mizo nungertem shilu ka lir.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND : KOHIMA

No.DHFW-5/D.Pharm/Part-II/2014/2962-65

Dated, Kohima the 3rd July 2025

NOTIFICATION

With reference to the Letter F.No.11(2)-RIPSAT(2021/291-97 Dated 8/5/25, the following Candidates are selected on 3rd July 2025 to undergo Diploma in Pharmacy (D.Pharm) course at RIPSAT, Agartala for the Academic session 2025. The following Candidates are provisionally selected through Academic Merit Marks.

Acceptance Letter may be submitted to the Office within 5 days from the date of issue of the Notification. Waiting List will be maintained for a period of 3 (Three)) months w.e.f the date of issue of this result.

Selected List :

1. Vizovonuo Neikha

2. Koi Shiu K

3. Jasmine Yanthan

4. Yemkong Tochumong C Chang

5. ArsenLongchar

Waiting List :

1. Mhadeno E Kikon

2. Kihianle Jemu

3. Diya Seb

4. Ngabam N

5. Bemang B Konyak

SD/-

DR. MERENINLA SENLEM

Principal Director

Directorate of Health & Family Welfare,

Nagaland : Kohima.

Gaza hospital director ka Israel-i amakdang tepsetogo

Gaza City, Chiteni/July 03 (Agencies):

Gaza nung Indonesian Hospital director ya Gaza City nung par kidang lia Israel-i tayimtsü amshia amakba nung kinunger kar densema tepset, ta kinunger kati ashi.

Dr Marwan Sultan aser par kinungertem Bodhbarnü southwestern Tal al-Hawa area nung par kidang asü, ta Hamas meyong civil defence agency ajanga ashi.

Israel mitkari Gaza City area nung Hamas indang "key terrorist" ka amak ta ashi aser yangji amakba reprangshimogo aser civilian tem yirutsüba mali ta ashi.

Kasa maoang al-Mawasi "safe zone" nung amakba nunga tanurtem densema nisung pongu tepset aser kar yiru, ta ashir.

Dr Sultan indang kinunger Ahmed Al-Sultan-i BBC Arabic dang ashiba agi, parnoki Bodhbarnü amakdang apokba angashi.

"Ni Marwan, pa kinungtsü, jalatem aser jaka kinungtsü Mohammed nunger ajunga tepset," ta pai ashi.

Hamas meyong health ministry ajanga ashiba agi Dr Sultan ya mapang talangka medicine nung inyaka liasü, aser medical ketdangsür anema mapa tamajung inyakba aitsü.

Tanen makai tashiyim amshiba kübok asen nüburtem kanga timtema aliba mapang Dr Sultan ya mapa nung bendanga agütsüba, aser temulung agüja nendaka inyakba temaitsü ka liasü.

Dr Sultan ya Indonesian Hospital indang director liasü, koba health ministry ajanga manemer anepalu mesüteter ta sangdong aser mapang tatsüka lir UN-ia Israel-i tanen makai amakba ajanga ki o jen raksatsü ta shia liasü. Israel mitkar temi iba tesem nung "terrorist infrastructure sites" anema rarar ta shia liasü.

North Gaza governorate nung tang functional hospital kata mali ta UN-i ashir.



agi Gaza shilem 80 shi Israeli military zone mesüra evacuation order nung lir ta ashir.

"Iba tesem ya kumzüka alitsü südi ta bilema parnok aru aser parnok yangi tepset. Parnoki kechi inyak?" ta Maha Abu Rizq-i ashi.

Osangbener temi tangokba video nung Khan Younis nung Nasser Hospital anasa gari ka anena yur nisungtem alua azü agi mezübanger aliba tanur ajunger aoba nguogo.

Mozüki telung nung tanurtem jeptepa liasü aser doctor temi parnok zübu anepalua liasü.

Gaza City nung ano Israel-i tayimtsü amshia ki ka amakba nung kibong ka nungi nisung pezü tepset, ta osangbener ajanga ashir.

Nisung pezü tepsetba ya Ahmed Ayyad Zeno, pa kinungtsü Ayat Zeno aser par jala Zahra Zeno aser Obaida Zeno nungertem alitsü, ta ashir.

Gaza nung Save the Children den inyaker Rachel Cummings-i osangbener dang ashiba agi, charity's child-friendly spaces nung "wishing circles" aliba mapang tanurtemi sür aliba pei tetsü mesüra tebu den alitsü mechi chiyongtsü aser tazü ajemtsü indang jembir.

Tan hopta UK aser Europe nung tzüngsang-mopung atsük-asa tali akumba ama Gaza nunga temperature 30C alemer.

Süki nung jenoka alirtemi electricity aser fans maka aser tzüng peria mali parnok temang mokonga alitsü tasak ta ashir.

Israel-i tanen makai Gaza nung bomb pokloktsür aser humanitarian aid tem Gaza telungi aitba noksanger.

Hamas-i October 7, 2023 nü Israel maka nisung 1,200 tepseter ano nisung 251 pua bener Gaza-i ao.

Iba sülen Israel mitkari Gaza amakba nung tanur 15,000 densema nisung 57,000 dak tema tepsetogo, ta Hamas meyong health ministry ajanga ashi.

MOLUNGYIMSEN SANGLIR KIDONGI

TENÜNGSANG AGÜTSÜR

Nagaland Staff Selection Board (NSSB) ajanga agiba Clerical & Allied Services tatidang nung tsürabur J. Bendang, IPS, IGP (Retd.) aser Mrs. Tiala Aier na jala, MISS. MOARENLA SANGLIRI Food and Civil Supplies department kübok Sub Inspector of Supply mapa ngutetba atema ozü Sanglir kidongi tenüngsang tulu agütsür.

Lai takok tajung ngutetba ajanga yimer ajak nüma tangteter aser kanga pelar. Nübur tenzüka wadang nung tetsüng ajemoka inyakdang Tulusang Tsüngremi la nem shisatsü maneni moajang aser temoatsüma nung len aniang ta onoki sarasademtsür.

SANGLIR KIDONG TENÜNG NUNG

Sajung Sanglir.

Trump-i Syrian sanctions agentsü tetuyuba agütsüogo



Washington, Chiteni/July 03 (Agencies):

Syria anema temerenshi/tenokdangba balala agüja aliba agentsü asoshi United States Tir Donald Trump-i executive order ka nung meyongnem agütsüogo, koba ajanga Tir Bashar al-Assad atsüngdoker itab trok dak tema lir iba linük nung investment lapoktsütsü.

Trump-i Hombarnü ozüng agütsüba ajanga Syria indang terenlok, par sorkar inyakyim aser par linük nung loktiliba tesendaktep tanaben yanglushiba nung tongtipang entities anisüngzük angutsü, ta US Department of the Treasury sangdong ka ajanga amshi.

Syria nung 2011 küm civil war adokba sülen US-i iba linük sorkar nem senotsü tsütsü temerenshi tulu agüja liasü.

Syrian Minister of Foreign Affairs and Expatriates, Asaad Hassan al-Shaibani-i social media X nung Trump telemtetba pela agizüka liasü aser iba ya ajanga mapang talangka nungi ata aliba yanglushiba aser terenlok maparen asoshi kishi lapoktsü ta ashi.

"Iba ya ajanga rongsenketzüng shia aruba nung tetsükdaktsü agentsü aser international community asoshi linüklapoktsü."

Taoba mapang sorkari meimchir temeden nung tashiyim amshiba dak sendakba nung densema temerenshi balala agütsüba ajanga Syria linük yanglushiba maparen nung tetsükdaktsü ajuru. Aser iba mechi al-Assad kübok Syrian rongsenketzünga kanga mejungi akum.

Trump-i May ita Middle East semdangba mapang Syria asoshi temerenshi agentsütsü nangzüka liasü.

"Syria tashi ita, lungiemer pei sasep aser kidanger den yimjung nung alitsü asoshi United States-i yaritsü temulungtetba nung lir," ta US tiri Hombarnü sangdong ka nung ashi.

"Kiralongrar telok jenoktsü magütsüba telungjem Syria aser tamangba yimsü aser kin tilatem kumzüka ayuba ajanga regional security yaritsü aser yimchiyimjung nung alitsü."

Trump administration-i al-Assad aser pa den sendaktepa alirtem, ISIL (ISIS) aser Iran aser par tembar nem sanctions agüja alibabo magientsü ta ashi.

US Treasury-i sanctions lists nungi Syria nunger aser entities 518 agienogo saka temerenshi karbo anga kerabo magientsü ta ashir.

Democratic US Congresswoman Ilhan Omar-i Republican telok nungi ozüng yanglur Anna Paulina Luna den lungiemer hopta tetenzüklen Syria nem tenokdangba agüja aliba agentsü bill ka benoka liasü.

Trump indang totuyuba nung US tiri Secretary of State Marco Rubio dang interim Syrian President Ahmed al-Sharaa ya "Specially Designated Global Terrorist" ta nüngja agüja aliba reprangshitsü shia lir.

Trump-i May ita Saudi Arabia nung al-Sharaa ajurua liasü aser iba mapang pai US tir dang Syria ya kidanger asoshi timtem aketba linük ka mesüdaktsütsü nangzüka liasü.

Australia-i 2032 Olympics atema \$2.2 bn agütsütsü

Chiteni/July 3, 2025 (Agencies): Australia sorkari 2032 Brisbane Olympics atema Australia dollar billion 7.1 intoka venue balala yanglutsü aliba atema A\$3.435 billion (\$2.25 billion) agütsütsü ta sangdongba sülen kiojen asü tenzüksü atema lenmang lapoktsüogo.

Iba Summer Games atema tasen aser yanglushitsü venue 17 aliba atema Queensland taxpayers aser private finance temi tanungba sen ya agütsütsü, ta state aser federal sorkari senotsü atema tenangzüktepba yangluba indang Brehostibarnü sangdonga liasü.

"2000 küm Sydney Games kanga takok ngua asayaogo aser Australia nunger aikati iba ya küm aika menungra bilemteter," ta Federal Infrastructure Minister Catherine King-i ashi, "Brisbane 2032 games takok ngua asayatsü atema onok renema lir, aser iba ajanga Queensland nema

kasa tajangshiba ya toktsütsü."

"Australia sorkari iba asayamung atema venue tem yanglutsü asoshi A\$3.4 billion agütsütsü nangzükba ya Australia nung sorkar kati linük nung siasabong atema infrastructure yanglutsü asoshi khenyongi senotsü timtiba agütsüba asütsü," ta paisa ashi.

Brisbane nem Olympics ayongzuka asayatsü atema 2021 küm temelaba agütsü, saka venue tem dak sendakba nung yimden yimsüsüba nung tatsütepba ka aliba ajanga taküm March ita-ang tatembangbuba telemtetba ka agia liasü.

Organising committee tekolakba Andrew Liveris-i Brehostibarnü iba osang sangdongba ya pelashishia agizükogo.

"Australia sorkari tawa intergovernmental funding ka atema agizükba sülen Australia aser Queensland sorkari

kanga kara jenjang agiba atema kanga pelar, iba ajanga mapa takaratiba nung tenzükttettsü," ta pai ashi.

Main stadium koba A\$3.7 billion intoka yanglutsü imlar, iba ya yimti kübok Victoria Park nung yanglutsü, koba Olympics mapang 60,000 sit-ter ka asütsü aser 2032 küm sülen Australian Rules football aser cricket asayatem atema ano menden 3000 bendenloktsütsü.

2032 küm swimming ayongzuka asayatsü atema aquatics centre tasen ka iba anasa A\$650 million intoka yanglutsü.

Liveris-i May ita, 2026 küm tatem tashi nungang venue tasenba ana atema mapa tenzükttettsü ta bilemer ta shir liasü. Federal sorkari local transport jenjang ajungkettsü atema A\$12.4 billion agütsütsü nangzükogo, koba 2032 atema kanga nüngdak ta Queensland sorkari bilemer.

Jarrad-i Everton den tenangzüktepba yanglushiogo

Chiteni/July 3, 2025 (Agencies): Everton defender Jarrad Branthwaite-i club den ano küm pongu atema t e n a n g z ü k t e p b a yanglushiogo.

Arishi küm 23 tain asayar shiba 2020 küm Carlisle United nungi dena liasü, pa atema Manchester United puri taoba küm anaben tashi bid süa liasü, saka magizük.

Taküma pa Chelsea aser Tottenham densema club aikati alizüksü atema tejangraba aliba sayuogo.

Ajisüaka Everton pur Goodison Park toktsür Hill Dickinson Stadium nung putu tasen ka tenzükba mapang pa ya club sentong nung tongtibang asayar ka ya züngshir.

"Ni kanga pelar," ta Branthwaite-i ashi, shiba indang contract 2027 küm tembangtsü liasü.

"Season tembangba sülen onok jembishinüa aruogo aser tang tenangzüktepba yanglutetba atema ni kanga pelar.

"Club-i kü dak tamang akaba aser taoba season ana tashi jangradema asayaba sülen kü atema iba telemtetba agitsü tasak masü asü," ta pai ashi.

Branthwaite

mezügbuba 2020 küm July ita taoba manager Carlo Ancelotti kübok Everton indang first-team nungi asaya liasü.

Pa Premier League nung 75 ben asayaogo, kong tetenzüki nungi 69 ben asayaba densema lir. Paisa tetoktepba ajak senteper tang tashi club nungi asaya 86 nung asayar lir.

Taoba season Everton pur PL nung 13buba nung tembangba mapang Branthwaite-i teyari tulu agütsüogo. Toba season manager Sean Dyche melena David Moyes shimba sülen club jenjang tajungba aküm.

"Ni Everton nungi küm pongu ser tesadang asayar aser ni taoba ita trok tsüngda club melenshiba nguogo," ta pai ashi.

"Manager-i team ka ama onok kongi odaktsüner aser pai taruba season onok nem kechi inyakdaksüner item ajak ya telemtetba agiba mapang asadanga liasü. Taoba season tatem onoki team ka ama kechi inyaktetogo, aji nenoki ngur alitsü," ta pai ashi.

Branthwaite Everton nungi asayaba mapang Blackburn Rovers aser Dutch club PSV Eindhoven nati loan nung oa asayaogo. Eindhoven nungi asayaba

mapang pai 2022-23 season nung Dutch Cup koka liasü.

"Jarrad-i pa tarutsü onok nem bendanga agütsüba atema pelar. Pa arishi küm 23 dang asünung pai taruba kümtem nung tajungtiba asayateta aotsü anunga lir ta imlar," ta Moyes-i ashi.

"Club putu tasen kati ayaoka aiba mapang pai tongtibang shilem agitsü ta amanger," ta Paisa shimsem.

Pakistan hockey team Asia Cup nung asayatsü

Chiteni/July 3, 2025 (Agencies): Bihar kübok Rajgir nung Asia Cup aser Tamil Nadu kübok Madurai nung FIH men's Junior World Cup asayatsü atema India sorakri Pakistan hockey team nem temelaba agütsüogo, ta sports ministry source kati jangjatsüogo.

Osang ajanga ashiba agi, Ministry of External Affairs (MEA) aser Ministry of Home Affairs (MHA) nati temelaba agütsüogo aser Pakistan nunger hockey asayatem indang visas atema inyakyim tenzükogo. Kasaji host federation - Hockey India (HI) nema metetdaksüogo.

Olympic Charter sülen anidaka India sorkari yimden yimsüsüba aser saisabong na bendanga toktsütsü atema

Liverpool asayar Diogo Jota gari lendong nung asü

Chiteni/July 3, 2025 (Agencies): Liverpool forward Diogo Jota, arishi küm 28buba nung gari tsükokba lendong ka nung süogo.

Iba gari tsükokba lendong nung pa tenu Andre Silva-a süogo. Iba lendong ya Spain nung Zamora province nung ataloka liasü.

Arishi küm 25 tain Silva ya-a professional football asayar ka liasü, aser pa Portuguese second-tier club Penafiel nungi asaya liasü.

Guardia Civil-i BBC Sport dang ashiba agi, Jota aser pa tenu na ya Brehostibarnü local time 00:30 meta asü.

Parnoki ashiba agi, tena ya Lamborghini ka nung oya liasü aser tanga gari ka ajateta aoba mapang tyre poka lenmang tezülani ao aser mi adoka liasü.

Jota ya taoba ita-ang Rute Cardoso den kibong kuma liasü. Tena jala jabaso asem lir.

Pai tawa social media nung tena kibong akümba indang noksa lemsatapa liasü. Tena June 22 nü kibong aküm.

Liverpool-i ashiba agi, Jota asüba osang angazuka parnok kanga temulung koremer, shiba parnoki 2020 küm Wolves nungi pound million 41 agi alizuka liasü.

Liverpool nungi 182 ben asayaba mapang pai goal 65 idaktsüogo aser 2022 küm FA Cup aser League Cup aser taoba season Premier League akokba mapang club nem teyari tulu agüja liasü.



Jota ya 2017 küm Atletico Madrid nungi Wolves-i loan nung ao aser iba sülen teti atema tenangzüktepba yanglua liasü. Wolves nungi season asem asayaba mapang pai asaya 131 nung goal 44 idakja liasü.

"Onok kanga temulung raksar. Diogo ya onok fan temi kanga sakloka liasü aser teammates temi kanga meimba den pa den inyaker ajaki tushia liasü," ta Wolves-i sangdong ka ajanga metetdaksü.

Jota shiba 2019 küm mezügbuba linük tenüng nungi asaya liasü, pa Portugal tenüng nungi tatemsa June 8 nü Nations League finla nung Spain akokba asaya nung asaya liasü. Pai national team nungi 49 ben asayaogo aser iba mapang goal 14 idakja liasü.

"Portuguese Football Federation (FPF) aser Portuguese football ajunga kanga temulung raksar," ta FPF-i ashi.

merangba nung shilem ka ama iba telemtetba ya agiogo.

India-i Pakistan team tem hockey asayamung ana nung ya shilem magidaktsüra International Olympic Committee (IOC)-i merenshitsü.

Iba telemtetba agiba tetezü Pakistan nungi asayatem tanga international asayamung atema India-i arutsü melatsü, koba Olympic Charter tanüla den putepa lir. Kasaji India nunger team tema asaya balala nung Pakistan den neutral venue tem nung asayatsü melatsü.

Hockey Asia Cup ya

Rajgir nung August 27 nungi September 7 tashi asayatsü aser 14buba Junior World Cup (under 21) ya Chennai nung Mayor Radhakrishnan stadium aser Madurai na nung November 28 nungi December 10 tashi asayatsü. Iba asayamung nung tang mezügbuba team 24 asayatsü.

Kiralongratemi Pahalgam amakba den India-i Operation Sindoor benoka inyakba sülen Pakistan team iba asayamung ana nung ya shilem agitettsü magitettsü mejangjai liasü.

BILEMDANGANG

"Taküm ya tensa agi masü saka asen telemtetba agi yanglur."